

四庫全書

史部

欽定四庫全書

史部
廣西通志卷三
四

詳校官給事中_臣鄧文泮

檢討_臣德生覆勘

總校官進士_臣朱鈐

校對官主事_臣陳文樞

謄錄監生_臣施華

欽定四庫全書

廣西通志卷三

機祥

漢

武帝元鼎中熒惑守南斗越分也其後越相呂嘉

殺王及太后漢兵誅之滅其國

漢書

平帝元始元年正月越裳重譯獻白雉一黑雉二

符瑞志

光武建武十三年九月南越獻白兔

符瑞志

章帝建初四年甘露降零陵洮陽二縣

後漢書

安帝元初元年三月己卯日南地坼長百八十二里其後三年正月蒼梧鬱林盜賊羣起劫掠吏民

後漢書

桓帝延熹七年八月庚戌熒惑犯輿鬼質星占有誅戮明年零陵桂陽蠻叛交趾刺史葛祗為賊所拘畧桂陽太守任印背敵走皆棄市是其應也

後漢

書

三國

吳孫氏黃武五年蒼梧鳳凰見

孫休永安四年布山白龍見

晉

武帝太康九年九月臨賀地震十二月又震

晉書五行

志

成帝咸和四年五月甲子白鹿見零陵洮陽獲以

獻

宋書符瑞志

咸康二年三月甘露降鬱林

冊府元龜

宋

文帝元嘉元年十二月丙辰白象見零陵洮陽

宋書

符瑞志

孝武帝大明七年正月己酉珊瑚連理生鬱林太

守劉劭以聞

宋書符瑞志

梁

武帝天監四年十一月天清朗西南有電光若雷

聲二近鼓妖也是歲交州刺史李凱舉兵寇亂

梁書

大同五年十月辛丑彗星出南斗長一尺餘東南

指漸長一丈餘至十一月沒占曰天下有謀王者

七年交趾豪李賁聚衆亂九年賁僭稱帝於交州

參隋書

天文志

唐

太宗貞觀二年三月宜州言白狼見十七年閏六

月柳州言慶雲見二十二年八月慶雲見昭州

冊府

元龜

高宗龍朔二年靈川縣大水有龍出時縣西山風
雨雷電七晝夜既霽山腹洞貫成巖廣百餘尺巖
中石壁皆印龍鱗溪水從巖流出可通舟楫而舊

溪為平陸

舊志

玄宗開元四年安南都護府江中有大蛇首尾橫
出兩岸經日而腐寸寸自斷數日江魚盡死蔽江

而下十五相附著江水為臭

唐書五行志

開元中

嶺南桂管竹生華結實如麥後竹並枯是歲饑人

採食之

舊志訂五行志

代宗大曆六年十一月湘源縣芝草生同根三莖

合成一蓋

冊府元龜

憲宗元和三年廣南山南東西皆旱

文獻通考

元和十

四年八月丁丑歲星太白辰星聚於軫占曰兵喪

在楚分與南方夷貊之國

唐書天文志

敬宗寶曆元年秋七月慶雲見於西方自卯及酉
桂管觀察使李渤圖以獻

文宗太和四年慶雲見於賀縣之丹甑山五彩氤
氲旬日不散因更山名曰瑞雲

武宗會昌元年四月桂州有馬生駒三足能隨羣
牧唐書五行志會昌中有黑螭見邕州鼓江流壞北岸

覆舟害人久乃去

粵西叢載

五代

南漢劉晟二年邕州鳳凰見時王弘澤鎮邕州有
善政晟怒使人酖之

宋

太祖建隆中有雙鳳巢於永福縣之華蓋山因改

山名曰鳳巢

永福縣志

乾德三年二月全州大雨水

宋史五行志

太宗太平興國七年秋九月梧州江漲入城壞倉

庫及民舍九年白州颶風壞廨宇民舍

宋史五行志

太

平興國間象州文廟產芝二莖五色俱備

舊志

淳化元年冬十月桂州虎傷人詔命捕之二年八

月藤州江水漲十餘丈八州城壞官署民田

宋史

真宗咸平元年夏昭州大霖雨水害民田溺人二
年廣南西路旱甘露降潯州五年春二月甘露降

桂州

宋史五行志

景德元年五月白州有三鳳飛集萬壽寺甘露降
義寧縣二年春正月甘露降鬱林州四年秋八月

橫州江漲壞營舍象州民圃芥生蓮花

舊志兼
訂宋史

大中祥符元年春正月桂州甲仗庫災三年甘露
降柳州七月昭州嘉禾多穗異畝同穎四年秋八
月邕州雲封寺柏樹生芝五本知州劉知誥以獻
五年夏五月藤州鐔津縣野蠶成繭州人異之織
絲以獻六月潯州六祖院紫芝雙秀知州高志寧
以聞六年邕州麥秀兩岐或三穗是冬昭州龍嶽
山資壽寺芝草生潯州廨舍生芝一本上分為二

其上又生二本凡三重

舊志參
五行志

天禧元年春正月甘露降貴州天慶觀十二月又

降於昭州

宋史

至道二年秋閏七月廣南諸州並大水

宋史

仁宗慶曆四年春正月甘露降貴州

宋史

五年秋七

月戊申昭州地震

舊志

神宗熙寧九年五月全州黑蟲食苗有黃雀來食

之盡

舊志

元豐元年秋八月邕州火焚官署民舍千三百四十六區諸軍衣萬餘裝穀帛軍器百五十萬二年十一月全州生芝十二本十二月桂州甘露降四年夏六月邕州颶風壞城樓官私廬舍八年濱州領方縣地陷

宋史

元豐中大理丞橫州梁世基家生

連理荔枝

舊志

哲宗元祐七年柳州禾合穗

宋史

紹聖間賀縣甌山下產芝

舊志

徽宗政和六年全州木有連理

高宗紹興五年廣西市馬多疫死

宋史五行志

七年廣

西大饑李實變為桃

本紀

十六年靜江府城北有奔

犢以角觸人於墻腸胃出牛狂奔兩日不可執卒

以射死十七年十二月辛亥靜江火燔民舍甚衆

二十二年夏五月容州野蠶成繭

五行志

孝宗淳熙元年廣西饑昭賀尤劇四年秋昭州螟

五年昭州有螟七年秋潯州旱十一年邕賓象

諸州皆旱饑十二年廣東西饑

宋史

十六年鬱林紫

泉出

舊志

寧宗開禧元年二廣諸州旱振之

通鑑

理宗端平三年昭州大水

宋史

寶祐元年昭州旱

舊志

度宗咸淳十年昭州蒼梧雨血著衣皆赤

梧州府志

元

世祖至元二十九年芝生賀州

元史五
行志

成宗元貞元年賀州旱二年七月廣西兩江道饑

元史

大德九年象融柳三州旱十年三月四月柳州民

饑給糧

元史

仁宗延祐二年秋七月全州江水溢害稼

元史五
行志

英宗至治元年十月昭州大水

舊志

十二月慶遠路

饑

五行
志

泰定帝元年八月全州饑二年四月潯州饑三年

六月梧州路屬縣水旱八月廣西兩江饑十一月

慶遠安撫司及靜江象州諸路饑

元史

致和元年秋七月廣西兩江諸州水

元史

文宗至順三年宜山縣民饑疫死者衆

慶遠府志

順帝元統二年二月太白經天未幾徭寇陷賀州

粵西叢載

至元三年夏五月賀州大水害稼

元史

至正三年夏六月梧州青蟲食稼八年五月庚子

廣西山崩水湧離江溢平地水深二丈餘屋宇人畜漂沒九年秋七月靈川縣臨江石崖崩十年六月戊申臨桂縣無雲而雷震死邑民廖廣達秋七月靜江荔浦縣大水害稼十一年秋七月靜江路大水決南北二陡渠十三年夏五月乙丑潯州颶風壞官舍民廬十四年廣西梧州大旱靜江等郡大饑人相食十七年冬十月靜江路東門地陷城東石山崩十八年廣西四縣賀州皆大水十九年

梧州象州皆大旱二十年賓州旱閏五月不雨至
八月二十三年春正月甲辰貴州江中有物登岸
蛇首四足青色長四尺許軍民聚觀而殺之乙卯
夜貴州火同知州事韓帖木不花判官高萬章及
家人九口俱死焉居民死者三百餘人公署倉庫
案牘燒燬殆盡是歲賀州大旱二十七年靈川縣
大藏山石崖崩元史至正間興業縣南十里村民見
一馬從石中出食草遂撲殺分食之惟一老婦子

婦三人不食是夜雷雨大作電光中人見蒼龍從
空下其嫗驚仆覺有人唱曰急出毋顧家母子遂
出上小山其村遂為大池人呼曰馬塘蒼梧縣呂

仙像指間芝生

梧州府志

明

太祖洪武元年冬十一月己未鬱江之旁有泉出
溢流於江其色深紫光潔可染時葉琛敕諭交趾
州守鄒天奇為之頌又云水有兩派其出不常出

則有異應自縣門流下者必擢賢守令或出英俊

縣上流下者應在僚屬其水長而狹色如紫練

一統

志

二年三月太平府有白鼠渡江自南而北晝夜

不絕未幾頒降各衙門印信

舊志

十七年梧州府大

雪

梧州府志

十八年太平府十萬山象出害稼命南通

侯率兵二萬驅捕立馴象衛於郡

太平府志

成祖永樂元年平樂大旱二年夏五月陽朔大水

蛇龍競出山谷成淵六年秋七月太平大水滄塌

城垣四百三十六丈串樓三百四十六間永樂中
宋村嘉禾生賀縣產芝先是洪武末縣產芝至是
復生人以為周張發解之兆

舊志

宣宗宣德九年田州旱夏五月南寧府不雨郡守
李晟偕鎮將等虔禱於天寧寺五日雷電大作雨
如注雨霽後殿前甃上有明月識三字非墨非粉
傍有巨人足跡微濕人咸異之有碑記

舊志

英宗正統二年太平府文廟災

舊志

代宗景泰四年冬柳州大雪

粵西叢載

五年上思州雜

鵝生四翼飛空去牛生馬駒六年鬱林州大水人

民流散知州余用訥奏准停徵米五千餘石民賴

復業

舊志

英宗天順六年太平饑斗米千錢賀縣桂嶺鄉大

龍塘水流盡紫光輝照耀上下經旬不變是歲大

兵征其鄉俘斬獍寇數千流水盡赤人皆指為泉

應孰知是時明孝穆皇太后紀氏方十歲帥臣以

幼女津送京師選入大內實誕孝宗始知紫泉之
兆故有在云七年秋七月乙未象州地震八年大

饑田州旱

舊志

憲宗成化七年冬十二月初五日蒼梧縣天鼓鳴
起自東南止於西北

梧州府志

十一年田州旱自五月

不雨至八月明年復旱十三年全州文廟右楹生

芝十八年春陽朔大水壞城屋二十一年平樂大

水蒼梧城隍幾沒漂流民居萬餘

舊志訂粵
西叢載

孝宗弘治二年春三月二十日巳時賓州忽晦冥

風大作尋驟雨迅雷雨雹破屋害稼傷牛馬未時

止三年陽朔縣龍潭水潮一日三湧五年太平饑

八年春太平府雨雹

舊志

九年夏四月賓州暴雨水

山崩地陷漂沒田禾民舍

粵西叢載

十年陽朔縣大水

十三年秋八月十一夜融縣大星長丈餘自西南

隕於西北又鼠殺稼十四年融縣地日炎如暑夜

寒如冬疫癘大行秋八月河水陡紅濁如黃河太

平大水灌陽縣竹生豆角楓結黎實十五年陽朔

縣饑

舊志

武宗正德五年春太平府地震夏蒼梧縣地震地
長白毛三四寸七年夏六月北流縣地震冬十一
月離江冰合八年北流縣蝗大饑秋八月宣化縣
田州地震聲隱如雷九年北流縣旱仍饑十年甘
露降梧州府學宮秋九月富川縣雷震西山崩七
處冬十二月夜蒼梧天鼓鳴十一年蒼梧博白二

縣皆大水自夏歷秋霖雨淹人畜公署民居多傾
頽二旬乃霽太平府大旱饑越明年仍饑十二年
夏四月十二日來賓縣遷江縣晝晦大雨雹破屋
折木殺鳥雀冬十二月十五日太平府地震是歲
慶遠府虎入城為害十三年武緣縣田州旱饑民
食薇蕨死者甚衆十四年桂林柳州大饑融縣尤
甚十五年陽朔縣饑富川縣楓結梨實雞生四翼
夏六月二十七日夜平樂蒼梧二縣地震十六年

夏五月慶遠府西北有星隕長五六丈蜿蜒如龍
光如電須臾滅秋九月太平府四更地震起於東
南止於西北有聲次夜又震

舊志

世祖嘉靖元年春三足白鹿見於懷集花石洞里
人逐至燕嶺失之夏五月全州萬鄉四都山崩水
湧壞田數百頃蒼梧縣漂民廬舍陽朔縣大水五
日不退溺死人畜三年田州地震冬十月慶遠府
天鼓鳴四年己酉秋太平大水象州大風雨官署

城樓民舍多傾壞漂沒行舟冬十二月桂林府都
司地陷大門左旗纛廟前皆有聲如雷陷地一穴
濶二丈五尺深一丈次日離前穴三丈許復陷一
穴闊二丈深二丈有青氣一道上衝良久始散五
年春二月容縣大水冬十二月十一十二日慶遠
府大霜池水皆冰人以為瑞六年虎入武緣縣城
七年宣化縣龍見八年陽朔縣邑山崩白面山崩
壓死民人張鳳銀妻女三口屋宇牛羊俱碎九年

隕石於上思州之西鄉枯羅村沒入地十年春二

月全州雨雹自辰至巳十一年太平旱饑虎入梧

州府城伏豫備倉尋捕殺之

舊志

十四年春三月容

縣雨雹

粵西叢載

夏四月容縣地大震者二蒼梧大水

漂廬舍城垣容縣及懷集饑太平府五月五日虎

入城民殺之嗣後越十日凡二虎相繼入城民俱

殺之十五年秋八月興業縣有虎惠民禱於城隍

七虎俱斃十六年夏四月全州平樂蒼梧皆大水

十七年全州大疫秋武緣縣大水十九年春富川
縣雷震學宮門是年毛熙擢魁二十一年夏四月
全州暴風雨有飛石隕柳山應泉池冬武緣縣雨
雪二十三年富川縣竹結實如米民採食之二十
四年富川縣鼠食稼二十六年春二月夜雷震全
州學宮松傷戟門梁柱二十七年夏六月全州萬
鄉四都山裂水湧三道汎衝民屋土田成河二十
九年夏六月富川縣白日忽聞有聲如洪濤移時

雨如注後大旱三十年春正月朔夜半雷震太平
府署時南寧府同知余光署府事宣化縣飛龍見
三十一年懷集縣饑融縣大疫三十三年太平府
有聲如巨礮從地中出三十四年春三月初七日
太平府地震自晨至夕北流縣石界里春夏民大
疫梧州府靈芝產於梧山書院舊志三十五年夏彗
星見桂林秋七月十四夕有星隕於太平府西南
光燭戶庭粵西叢載三十六年春橫州大雨雹是日未

時州北三十里交椅銀水六村長寨等處忽震雷
暴雨雹大者如升小者如雞卵有柄有三角至七
八角者傷村民牧豎十餘人殺牲畜屋瓦飄散竹
木枝葉如削野草糜爛室中雹積約二寸許三十
七年宣化縣竹生連理四十年冬十月十六日陸
川縣火焚公署民居幾盡四十二年夏六月十四
夜有流星如雨自桂林東南至西北秋七月熊入
太平府郭內居民格殺之冬十月靈川縣日未出

地浮白光既出見青輪高一丈旋復常明

舊志四十

三年龍隱山崩

粵西叢載

四十四年夏六月武緣縣大

水四十五年春正月荔浦縣野鹿入城秋九月荔

浦縣火城內外官署民居悉燬

舊志

穆宗隆慶元年夏四月富川縣大水奉溪山崩七

處四年恭城縣城中獲鹿五年夏五月大水太平

府城淹頽三百餘丈思明平樂賀縣皆大水六月

桂林龍隱山白晝獲虎是歲獨秀山崩石一丈餘

布政司地陷梧州饑六年容縣饑夏五月大水堯

山崩武緣縣田州地震

舊志

隆慶間懷集縣有墨文

白虎見於天馬巖案召南詩註騶虞白虎墨文仁

獸也

縣志

神宗萬厯元年融縣虎為害二年懷遠縣虎為害

猺獞村大疫秋七月朔懷集縣地震望日又震三

年懷集縣大旱民饑六年春正月臨桂縣東鄉冷

水村地震聲如雷陷周廣約十丈深不可測七年

荔浦縣牛生二犢夏五月北流縣大水漂沒城垣
民舍秋懷集縣禾二穗九年賀縣三乘寺後一柿
木大尺餘僧斧之忽兩開中有用力不同四字兩
邊俱有字跡衆異之白縣貯之庫十二年正月朔
荔浦縣大雷電雨雹舊志梧州府大旱蠲免蒼梧災

米蒼梧雜記

冬十二月朔武緣縣大雪後連年有秋舊志

十四年春三月懷集縣古城大水岳山麓崩秋七
月梧州大水廬舍田禾盡淹沒藤縣鬱林博白北

流皆水官發穀賑之

梧州府志

冬十二月十八日平樂

府地震

平樂志

十五年融縣饑十七年桂林地震如

雷陽朔邑山崩壓死二人十九年夏五月博白縣

登高嶺左小河流紫水七日二十年冬十月懷遠

縣鵲巢文廟殿中大如益二十二年甲午夏昭平

縣蛟起明源江化為龍懷集縣春雹秋旱二十三

年二月容縣雨雹如飛石是年秋旱歲饑二十四

年八月初九日賀縣闔邑池塘忽湧城中為甚是

日知縣翁懋勲遷湧泉庫於縣堂之東人以為應
云二十五年丁酉春雷震昭平縣學櫺星門是年

廖蕭領鄉薦懷集縣饑二十六年冬十二月二十

九日永淳縣地震二十九年夏四月十五日容縣

大雨雹

舊志

三十二年夏五月二十八日夜桂林地

震六月初四日又震八月二十六日又震十一月

又震

粵西叢載

三十三年夏五月六月秋八月陸川縣

連震

梧州志

三十九年春三月邕州雹大如斗城中

屋瓦皆盡

嶺南
瑣記

四十一年融縣大疫

舊志

四十二年

春昭平縣雨雹

粵西
叢載

四十三年秋七月恭城縣勢

江山崩出蛟平樂縣河水暴漲魚死蔽江水不可

飲民掘泉取水四十五年秋八月初四日恭城縣

大雨如注山澗水湧連崩一十三嶺樹木拔折沿

江鱗介多死巨木散材河干山積是歲柳州大旱

融縣尤甚人民死亡相繼鬻賣男女不下數千人

鐵爐廂及上郭拱辰坊北城脚烟火之地盡為坵

墟明年未復業知縣應懋璜代輸糧賦四十六年
全省大旱民饑南寧尤甚慶遠府多疫癘夏六月
恭城縣諸溪不雨而漲山洞間傳有龍鬪山水若
決土多泥淖濱江多徒手拾魚八月至於十月桂
林及梧州每夜有巨星見東方長丈餘有白氣如
矛如匹練自北而南是歲梧州大火燔官民衙舍
死者數十人惟府內清軍廳獨存四十七年容縣

虎入城

舊志

光宗泰昌元年秋九月梧州府火燔八百餘家知府陳鑑同知陳熙韶捐俸恤之丙申夜天鼓鳴天

裂閃光如晝聲如雷

蒼梧雜記

熹宗天啓元年夏五月平樂梧州大水二年春二月平樂縣雷大震鳳凰山大松偃夏四月大雷雨

龍池井龍出四年陽朔縣旱饑民變

舊志

懷宗崇禎元年懷集縣大雨雹旱三年冬慶遠府大雪明年大熟六年秋七月平樂梧州南寧思恩

大水宣化縣水灌入城漂流近河民舍八年融縣
大水入城五月平樂縣地震河山聲如雷吼十年
正月元日平樂聞雷冬懷集縣大霜十一年恭城
縣禾二穗十三年恭城縣鄉民獻白兔十六年夏
五月賀縣城內陳侯祠前榕樹大十餘圍忽枝上
發紅蘭花二朵大如掌是年冬土寇破城奪印後
三省兵剿平之十七年興業縣蔡山崩百餘丈慶
遠府饑饉相繼民不聊生盜賊蠭起龍州初建土

署時採木為梁名撈木運至河忽自竄入水至時
木忽浮出及明年土官趙有涇為庶兄有濤襲殺
後龍州有亂木即先起

舊志

國朝

順治二年春三月平樂縣雨雹大如鵝卵小如雞
子中六畜皆死人民亦被傷是夕月下見黑氣如
鎗自了髻山乘雲而來衆共駭之

平樂志

蒼梧縣旱

二月不雨至八月歲不收三年復大旱宣化縣地

震四年夏五月岑溪縣雨雹大如碗六月梧州平

樂大水

舊志

五年梧州桃李實如瓜

蒼梧縣志

夏五月平

樂水

平樂志

冬懷集大雨雪

懷集縣志

七年太平府有黑

斑乳虎白晝噬人尋自斃山中

太平府志

十年春二月

壬戌梧州大雨雹風拔文廟松饑六月大疫思德

安平二鄉尤甚

蒼梧縣志

十一年冬十一月南寧府大

雪積數寸明年大豐十三年土江州近城有池廣

一畝水忽變赤如血未幾忠州思明土官以兵破

州殺土官黃廷傑

舊志

康熙二年秋九月初八日灌陽縣山崩水湧衝壞

民田經

題報豁免七年春正月昭平縣城西北隅有白氣一道下垂經月不散夏五月太平府大水自交趾來沿河村落房舍漂流八月崇善縣獄中火燔縣治及參將公署延及民房十年春三月雷震河池州故址地裂出死蚯蚓數石太平府城連內外八日

火每日夜數發前一月郡民葬父於府南岡署崇善縣諳堪輿謂葬動前山火星令別葬火遂息十三年春桂林府龍隱山崩安定門外山亦崩冬十月初九日東南天鼓鳴有聲如雷有火如帚橫空而過是時孫延齡作亂十四年慶遠土司有小馬頭生兩肉角刷之遍身炎熵後為提督取去十七年秋八月南寧府城內外火焚二千餘家次日城外復燔數百家十八年夏六月鬱林疫二十年太

平府思明府等處旱饑知府詳報運米賑濟施粥
於三清觀民賴全活二十一年春三月慶遠田州
雨雹秋八月河池州田禾焦燬芋苗葉盡生烟二
十二年田州蝗慶遠春夏不雨知府白啓明禱於
神清滯獄釋無辜甘澍立沛是歲豐二十七年春
正月麗江蚌產明珠自瀨灘以上馱綿以下夜間
珠光映徹水上沿江村民採蚌剖珠小舟絡繹不
絕至四月止三月桂林大雨雹大者如碗城西南

尤甚二十八年思明府見白氣一道自東南起直衝數丈月餘始息二十九年冬懷集縣大雨雪三十一年田州火有物狀如人見屋上所見之家即災四十一年田州武龍甲山中生芝四十六年秋平樂疫冬十二月十八日荔浦縣署後居民失火北風大作焰及衙舍知縣許之豫祈天反風火熄四十八年春二月己酉懷集縣大雨雹戊午又大雨雹五十年平樂縣除夕大震電驟雨達旦五十

二年雷震田州夏五月平樂大水濱江田宅衝壞
米價騰貴六十年歲旱無收次年存饑鬻男女者
甚衆巡撫檄各縣平糶倉穀民賴以甦舊志

雍正元年春三月融縣雨雹是年大有二年秋八
月陽朔縣興坪墟火一墟皆燼知縣侯靖捐穀恤
之六年冬十二月永福縣雨雪明年大豐七年春
正月永福縣雨雪是歲及明年俱大豐八年桂林
府各屬嘉禾生永福縣耜田及九里有一莖雙穗

至五六穗者九年五月二十九日南寧府申言慶
雲見祥光五色形如苞鳳篆成山字擁護日邊自
卯初至辰已經歷三時十年藩司署自春及夏芝
草叢生六月初四日午時臨貴縣等見日麗中天
輝如華蓋五色環匝光明勝常初十日午刻復見
如前為時更久巡撫金鉞繪圖以進十一年鬱林
州之富民鄉藤釐坡瑞泉出自平坡天然湧流泉
穴圓廣一六尺許一四尺餘味甘色清資利灌溉

巡撫金鉞具奏奉

敕建祀泉源神廟以荅靈貺三月桂林府廨木筆一枝
變玉蘭色香俱異夏藩司署芝生九本蟬聯五色
備狀十二年夏四月八日鬱林瑞泉祠興工祥雲
捧日更歷己午二時有若鸞鳳花藻狀繽紛圍繞
五色光華巡撫金鉞繪圖上之秋七月二十四日
慶雲見柳州五色映日自午至未光彩異常提督
張應宗巡撫金鉞並以

聞

廣西通志卷三

欽定四庫全書

廣西通志卷四

圖經

山經地志非圖無以辨方位而昭形勝非經則支
條綿亘脉脉絡分合不能劃然於方幅間粵西東錯
廣東西際滇黔南界交趾北連永寶幅員之廣輪
延袤何止數千里其間萬山戟立三江帶盤郡邑
星羅諸蠻窟宅於中土為屏障於交夷為關鎖所

繫不綦重哉我

國家聲教遐宣仁漸義摩唐宋羈縻諸州久置郡邑
泗城鎮安亦改土歸流化椎髻而尚衣冠矣譜其
山川而析其形勢猶得目為窮荒邊徼耶固圉誠
民安封疆而佐昇平則於官斯土者有厚望焉志
輿地

廣西總圖經

廣西楚越之交在京師南春秋時越并有吳地北

伐齊西伐楚自荆以南皆屬於越周顯王時楚滅
越吳起相楚悼王南并蠻越遂有洞庭蒼梧越諸
邊疆皆屬楚其後越人散處江南海上各為君長
有甌越駱越之屬甚蕃故曰百粵以揚州南境故
曰揚粵王翦定楚南地秦始皇利粵之犀象珠璣
欲乘勝進攻粵使尉屠睢統五軍郡監史祿鑿渠
以通糧道殺西甌君譯吁宋越人皆入叢薄中與
禽獸處莫肯為秦者陰置桀駿以為將夜攻秦人

殺睢秦乃大發兵畧取陸梁地為南海桂林象郡
以適遣戍粵以東屬南海郡粵以西屬桂林郡而
慶遠思恩太平以達交州俱屬象郡焉漢武平南
越趙佗孫光降以其地為蒼梧鬱林合浦郡屬交
趾部三國吳析合浦以北蒼梧鬱林郡屬廣州晉
以始安臨賀屬湘州梁分湘廣之交屬桂州唐以
其地隸嶺南道後開拓諸蠻峒落置羈縻州郡數
十五代時入南漢宋平南漢以屬廣南西路元改

為嶺南廣西道肅政廉訪明改為廣西布政

本朝因之東至湖廣道州界西至雲南特磨界南至
廣東高州界北至湖廣武岡界橫袤萬餘里山勢
迴環衡湘扼其背九疑五嶺介其肘腋水合夜郎
牂牁滙邕柳下潯梧合灘水入於海雖石稜竹箐
之間田賦若不足而山川險要雄峙西南為中州
捍禦焉

廣西總圖說

明
楊芳

粵之西三江環抱錯編戶於蠻獠不當十四五烽
警時聞左右二江土蠻最桀黠時治兵相攻窺及
內地自韓襄毅翦定藤峽始稍稍面草未幾而遺
孽滋蔓嘉靖戊子己亥間凡再尋師焉當府江之
道既梗十寨煽虐古田懷遠雒容諸邑沒於夷者
數十年今採羣議特設重臣開府於是督撫同心
武功丕振遂恢復古田而州之懷遠雒容還其故
邑嗣雖間有小醜或厪當事之憂然簡率繕兵受

屢履畝已不遺餘策顧法久而蠹人習而玩耨鋤
之卒寢亡營壘之防頓弛官目里胥憑其勢稜以
朘削恫喝於谿崗兼之墨吏因緣為市極目痛心
蓋不止府江是已柳屬諸獐多托跡豪右名謂佃
主實則逋淵及一旦盜兵尚為左袒此豈可獨咎
於狐兔輩哉邕麗改土為流諸斤斤奉法足為交
南扞蔽武靖部落既散苗裔亦斬絕歸我版圖正
惟其會不可不早為計也惟是慶遠諸蠻剝膚為

甚忻城已淪異類永順永定侵及近郊而南丹肆
行剽掠於往年竟釋不問迨勤封事聽其謾詞謝
罪取偽蠻以獻荔波洊遭荼毒其民義不背漢令
長歲入其地輒環泣挽留曰獨何以遐棄我則增
城置戍實慰引領雲霓乃牽制鄰疆悠悠歲月義
膽灰落封豕轉滋彼其不為懷遠為浴容且將為
程縣之續矣夫粵西之蠻獠固亦能投戈負耒輸
我貢賦土司恃符章為重其尊寵廢辱亦惟我之

視是尚可以化誨懷服也結以忠信鎮以威畧使
無困於繁網無苦於多求豪猾怵誘之謀不得生
窺伺攘竊之奸不得逞是皆可以卵翼字而鞭箠
使者昔人謂邊方之官非才不足任事非守不足
服人有封疆之責者其尚加之意云

桂林府圖經

桂林府為廣西省治東至湖廣永州府道州界六
百里西至柳州府雒容縣界二百六十里南至平

樂府荔浦縣界二百一十里北至湖廣寶慶府武岡州界三百八十里自府治至京師七千四百六十里領州二縣七其山桂嶺其水桂江故附郭曰臨桂縣北一百三十里曰興安縣有海陽山其下湘離之水出焉西北五十二里曰靈川縣南一百四十里曰陽朔縣有興平水南流入離西南一百里曰永福縣有鳳巢山鳳嘗棲之其上有池西北八十里曰義寧縣有靈鷲山其上有瀑泉義江南

流入永福又鑿渠東引入於灘西一百五十里曰
永寧州東北二百五十里曰全州有文山洮水出
馬三百四十里曰灌陽縣灌水出焉灘水經興安
者本秦史祿所鑿號靈渠經臨桂者為桂江東至
梧會黔鬱合江而入海北流為湘水合洮灌於全
州至零陵匯瀟水入洞庭湖世謂桂嶺摩天灘波
經地水環湘桂山類蓬瀛其山水誠奇瓌甲天下
靈川以北陽朔以南山崗多猺獞永寧尤深阻明

殷俞諸公肆力蒐鋤古田克靖民乃獲有寧宇今
蠻風丕變弦誦日興而人文盛矣

桂林府圖說

楊芳

桂林帶江襟山控制蠻荒千里蓋西南一都會也
湘與瀕互流橫奔逆折勢難飛渡則平樂其門戶
云陸則陽朔為東南衝而金寶頂之村猺獞最叢
永福捍其西南四隘雲聯薄於修荔又一要害也
義寧靈川興安全灌為西北屏藩而義寧之六隘

靈川之七都灌陽之各源興安全州之澗崗時相
侵噬蓋彼之勾引為害非一日矣所幸古田蕩平
漸歸撫化間或夷性自起讐殺然窺伺之心未萌
惟是偷人不無潛發而營衛堡隘之設固不可疎
也今計兵之在郡者七千八百有奇在諸屬者六
千八百有奇兵衆餉煩典藏者能無匱乎嘗考舊
所編派於民與民之所以自為計者而未始不深
為疆圉慮也夫山多則地硤民拙則策短偷安而

坐食則生不衆而為不疾是以其郡恒貧重以田不自耕而招佃於猺獞是藉寇糧也習則招主為猺獞摹畫轉啗吾民是資盜謀也又習則彼不以為我主而反乘之視招主若杞上肉是始以為利而終以為禍也郡貧矣而民又自為尾閭以自匱兵食其何以資無論桂林凡粵郡皆然易稱殯豕之牙詩營桑土之戶招主固禁而為豕以礪牙引寇而內之戶欲民寧處弗可得已

平樂府圖經

平樂府在省治東南東至廣東連州連山縣界五百六十里南至梧州府蒼梧縣界二百六十里西至桂林府陽朔縣界六十里北至桂林府灌陽縣界一百四十里自府治至京師七千六百四十里領州一縣七附郭曰平樂縣山之奇者有目巖誕江出其東荔水出其西合流入於灕江西北一百里曰恭城縣有雲殿山白雲所興有平川有西水

有葛溪分流而合於樂水東北二百六十里曰富川縣有富江東二百八十里曰賀縣嶺曰臨賀水曰臨水曰賀水西一百三十里曰荔浦縣有蒙山蒙水出其下西南一百里曰修仁縣荔水經流入於瀕南一百二十里曰昭平縣山則北陀五指水有龍門天池又西南二百里曰永安州激江東流與蒙江合入於海府居梧桂中與清湘九疑鬱相繆焉環以縈密諸山匯以瀕樂二水勝槩天出嶺

表要領也自梧而北離瀧險惡至是始平故曰平
樂江水近府始迤演故曰府江宋明時獠獠嘯險
為亂去城不二里輒鳴矢鏃矛禦人而魚肉之今
沿江置汛哨堡森如即危灘孤嶼昏夜亦可停橈
何治亂懸殊若是也臨賀為五嶺之一地近楚大
源山實通逃淵藪今設廳營並駐麥嶺永安萬山
深阻明始設州治荒陋不免然拊循振作何地不
可為鄒魯是在長民者之責也夫

平樂府圖說

楊芳

平樂境內猺獞十居七八自濱江至昭平夾岸置
堡數百里聯綴以銷亂人出沒之患北陀故稱夷
窟今盡覆其巢業已剏城屯兵而勢江諸源猶然
窺竊今於平樂縣地曰田沖者為西岸要害置裨
將營劄焉永修荔自殄韋蠻增兵分戍民將帖席
然此兵名備三邑實鎮荔浦永安在深谷中猺獞
順軌固亦無虞而修之梁羅二族生齒繁夥漢民

僅二三戶良獍類漢者僅九十戶荔鎮既遠尾大能無隱憂頃雖設有堡守而形單力薄未足以濟況南界柳象常苦讎殺勢不得不增兵增兵即益餉而郡實窶人餉將焉出舊取給於梧梧又取給於東粵茲中使權酤梧與東粵恐無望矣以兵之不得不增而苦於餉之無所從益故昭郡今雖堂處而十年之後事未可知曲思逆計誠所蒿目而不能寐者

梧州府圖經

梧州府在省治東南東至廣東肇慶府封川縣界
四十里西至潯州府平南縣界一百九十里南至
廣東高州府信宜縣界四百二十里北至平樂府
賀縣界二百一十五里自府治至京師八千里原
領州一縣九雍正三年改鬱林為直隸州析博白
北流陸川興業隸之今領縣五附郭曰蒼梧縣有
繫龍洲屹然中浮三江砥柱也有銅鑊山石壁嶙

峴登望大江如帶西六十里曰藤縣有鐔江繡江
會黔鬱合江入於南海又西三百二十里曰容縣
有大容山有都嶠洞天西南一百八十里曰岑溪
縣有皇華江東北三百六十里曰懷集縣有四門
巖朝巖燕巖最奇懷溪匯諸水經廣東四會縣入
於南海史稱梧州地總百粵山連五嶺蓋二廣上
游八桂門戶明成化間於此建節鎮南控容邕西
顧桂柳東應廣肇於以坐制陽崗諸蠻而東南無

宿憂今聲教誕敷荏苒無警蠻夷風俗日以丕變
較諸唐宋元明之世不亦善乎因天然險隘設關
以扼海涯商檣賈艘風指雲集誠炎徼之赤郡云
梧州府圖說

梧踞五嶺之中囊九疑三江之槩為粵東西咽喉
西枕藤峽八寨諸蠻出沒無時東南接封川信宜
鼠竊狼吞窟穴其間曩屢勤師征旋服旋叛開府
總制或以勲臣內臣鎮之迄今百有餘載山防江

哨棋布星列總一郡十屬所戍守軍兵凡一萬有餘蓋屹然稱重鎮矣第頃來帑藏寢耗內地虛曠歲登物產不供或半需於鄰或半需於商小大坐食卒惰而將驕客兵多不用命識者謂此非細故也然則申法令汰老弱來商賈廣樹藝秉廉敦素在吾黨當有以身率之者

潯州府圖經

潯州府在省治南東至梧州府藤縣界一百九十

里西至南寧府橫州界二百二十里南至直隸鬱
林州界一百九十里北至柳州府象州界三百三
十里至京師八千七百二十五里領縣四附郭曰
桂平縣有白石山與勾漏洞通巖巒秀絕仙靈棲
馬黔水鬱水合為潯江經藤梧入於南海東一百
三十里曰平南縣有鷺石山龔江水東會潯江入
海西一百四十里曰貴縣南山峭拔秀色千里而
浮水沉水合流入於鬱江有紫泉其出不恒北二

百四十里曰武宣縣有陰江新江滙洛清紅水諸
巨川南注於潯江縣舊隸柳改隸賓雍正七年始
改屬西二十五里曰武靖州今改為鎮大藤之水
出焉是為峽江會黔水合潯江入於南海夫潯水
國也北黔南鬱環以二江大隍濤迴中開沃野封
域廣袤實有古三州之地茲又增之以武宣毗他
郡蓋不為小雖山水奇秀映帶城郭連數百里勢
如游龍然蠻溪獠崗鳩虵易叢撫涖者思昔五山

藤峽鋌而走險實盜藪夷錯今皆草心而不復怙
亂驅民之善是在威德並行

潯州府圖說

潯襟喉兩江隱然天塹而叢巖複嶺環峙蓋西南
要區也第地廣山深猺狼錯雜沙田藤峽山心羅
運九懷等巢所在難以一二計狼子野心叛服無
常雖鎮巡星羅營堡棋置羈縻化誨駸駸漸洗夙
習然衣袵之戒固未可以一日忘也

南寧府圖經

南寧府在省治西南東至潯州府貴縣界三百四十里西至太平府羅陽縣界九十里南至廣東廉州府欽州界二百七十里北至思恩府武緣縣界六十五里自府治至京師八千三百十二里領州三縣三土州四寨一崗一附郭曰宣化縣有馬退山馳奔雲矗亘數百里諸山來朝勢若星拱崑崙山因險設關以扼蠻崗關前水曰大沖江在府東

北邕水在府西北八尺水在府南俱入鬱江東二
百八十里曰橫州灘曰烏蠻有橫槎江有月江州
西二百里曰永淳縣東班之水入於鬱江西南二
百里曰上思州有十萬山為明江之源經交趾至
太南為左江西七十里曰新寧州西北二百四十
里曰隆安縣二百六十里曰歸德州四百二十里
曰果化州五百二十里曰下雷州五百五十里曰
湖潤寨雍正十年與下雷並改隸鎮安西南一百

九十里曰忠州二百四十里曰遷隆崗南寧昔之
邕管也與桂林嘗並稱大府水陸交衝原隰平曠
控制狼土三十六崗永平橫山二寨尤險要南連
交趾西接滇黔全粵屏翰至所屬上思橫永襟帶
欽連藩籬肘腋左江誠重鎮矣

南寧府圖說

南寧為粵西壯郡雖叢錯三十六崗顧其地廣幾
十里而橫山永平尤稱要害昔唐宋咸建牙置帥

以與桂州埒益視諸郡獨遼曠屯可容數萬人云
自猺蠻不靖仗力於狼用致諸狼稍驕難盡束以
法守邕者在深察夷情之向背而低昂伸縮恩與
威兼焉邕庶幾其永奠乎

太平府圖經

太平府在省治西南東至南寧府新寧縣界二百
里西至交趾高平府界二百五十里南至南寧府
忠州界七十里北至鎮安府向武州界三百里自

府治至京師八千七百四十二里領州四縣一土
州一十有八縣二司二附郭曰崇善縣東北曰左
州曰養利州曰永康州南曰寧明州皆流屬也至
於江州思州在其南羅白縣在其東南思陵州憑
祥州上石西州下石西州在其西南太平州安平
州上下凍州上龍司下龍司恩城州龍英州鎮遠
州侏倫州在其西北茗盈州全茗州在其北結安
州萬承州都結州羅陽縣在其東北皆土屬也城

據麗江西岸江源一自交趾高平府經上下龍司
一自上思州經遷隆峯俱會郡西統城三面而東
下後山一線展而為城於東咽處作垣以截之曰
壺關與柳絕相似左右各擅其勝也設治於茲而
新改之寧明則以同知兼轄土屬之下龍則以通
判駐攝臂指聯屬內以防察土官外以控制交趾
誠左江之鎖鑰邊陲之藩屏矣比復欽承

諭旨查按通交各徑路添設汛防固圉寧民至意何周

暨也疊嶂拱護者以青蓮為最麗江至合江鎮匯
右江下南潯東入於南海

太平府圖說

太平據青蓮山之陽麗水旋折四交若壺因號壺
城城後諸山聯絡隱約類蠶叢蓋五嶺以西一重
嶂也遠郡皆土蠻雖始多逆命倔強然既改土為
流虎符朝至而夕即赴焉無敢後先與內郡無以
異况無猺獠諸種之雜百姓自耕自守無所謂名

募之兵而實亦無所事於兵也庶幾壺城之以太平名其有自耶獨養利孤懸於土蠻中四無唇齒之附時罹侵掠不得不早為之備而上下凍及安平之古鎧等隘則境與交趾鄰即邇來未嘗有虞而防周於意外其可以漫自委耶

鎮安府圖經

高輯

鎮安府在省治西東至思恩府田州界一百六十里西至歸順州茶嶺接交趾高平夷府界三百六

十八里南至太平府龍英州界一百五十三里北
至田州界九十里自府治至京師九千五百九十
里故土府改流隸思恩通判雍正七年裁通判而
設知府以思恩所屬之六土州隸之其地包絡雲
山為金湯東南曰崇山文筆峰標然樓櫓之外歸
順馱命兩江左右濚迴黑巖蓮塘幽勝天成而明
暗異焉東北一百五十里為奉議州地濱右江改
土設流官州判南一百六十里為向武州水有勢

溪滄江山有武城北感南一百九十里為都康州
廣袤十四五里西南一百四十八里為歸順州方
三百里鵝泉流珠水澄流而滂湧又西南一百六
十八里為上映州地稍倍於都康西北一百五里
為小鎮安地與歸順等皆西連交趾而泥丸封谷
安內攘外實西陲藩垣要郡又南一百六十里為
下雷州南一百八十五里為湖潤寨舊皆屬南寧
雍正十年以地界與府差近改屬焉

鎮安府圖說

鎮安北枕牂牁東南襟帶思太西南則雲南交趾
壤繡錯焉宋設宣撫司元路明府要皆羈縻之

本朝因其故絕改流設通判隸思恩府四面環巒官
多寄治雍正七年裁通判始設知府以思屬之奉
議諸州隸之小鎮安居府西北界滇南接交趾保
樂州為粵極邊永樂間始置分土府官男治之故
別其名曰小非其地小也歸順在府西南雍正九

年改設流官知州界連交趾高平保樂兩州境均
稱要區今以遊擊鎮歸順守備防小鎮安千總防
府犄角星羅至森密矣然而漢土殊情親疎異好
是在保障者誠求而審察之也

柳州府圖經

柳州府在省治西南東至平樂府修仁縣界二百
六十五里西至慶遠府宜山縣界一百六十里南
至潯州府貴縣界二百七十里北至湖廣靖州綏

寧縣界五百六十里自府治至京師七千八百三十里原領州二縣十附郭曰馬平縣有駕鶴之山其下柳江繞焉經潯梧入於南海東北六十里曰雒容縣有雒清江入於柳江西北一百九十里曰羅城縣離縣東北二百餘里為通道鎮塘頭崗馬崗冷諸村萬山盤錯土蠻倚為巢窟今設千總扼隘分防北八十里曰柳城縣又北三百一十里曰懷遠縣有水曰融江湖流而上經梅寨以達古州

都江為通黔水道近時糧運資之西北二百五十里曰融縣有真仙巖石崗玲瓏流泉觸之清如環珮是為靈壽溪其東北為融水經柳城入於柳江東南一百三十里曰象州西有象山其上多雲南一百里曰來賓縣大江繞城下曰紅泥夏秋常翻濁浪舊領賓州雍正三年改直隸州割來賓遷江上林武宣四縣轄焉嗣以武宣改屬潯州雍正十二年改賓州及遷江上林隸思恩府而以來賓仍

歸屬府昔稱山水清曠石峰多奇秀峭拔仙靈遺蹟往往而在其民亦多聰穎東北連昭桂西南接思邕衆流逶迤與牂牁會邊於夜郎為駱越要害提督駐節足以鎮壓諸蠻屹然中堅踞西粵勝勢然在前明皆伏莽區也因時衰益可無審厥控制以專寄重者歟

柳州府圖說

柳之屬凡十有二循隙選隘連亘幾二千餘里郭

以外繞地率猺獞矣然邇多向化稟約束惟一二
三四五都撫獞間作不靖柳城兩江盤迴左右四
達灘瀧險惡道路顛危而民多狡諸巢項雖畧定
未可忘虞心融之大難小源諸蠻剽掠時作來賓
之北三北五諸獞反側亦靡常遷江民少而獞多
與八寨連若負嵎之虎迨天未雨計當何如上林
邇於八寨出沒難羈又有猺曰長崗鵝頭既剪之
後遺孽猶未熄也象俗差淳而大洞梁羅等猺時

聞虜殺狂恣武宣民與僮雜南入桂林又南過大
藤馬陋諸猺林立繡錯向背莫料所賴在事者審
度地勢慎固封守則十二屬屏翰豫矣

慶遠府圖經

慶遠府在省治西東至柳州府柳城縣界四十里
西至貴州豐寧下司界四百三十二里北至貴州
都勻府荔波縣界三百二十里南至思恩府安定
司界一百六十里自府治至京師八千三十二里

領州二縣四土州三土縣一土司三附郭曰宜山
縣北有會仙之山多靈草嘉禾舊府所轄清潭南
鄉功德窰灰四里乃永定忻城土司地割屬今以
宜山縣丞改理苗分駐楞村矣又北九十里曰天
河縣龍江之水出焉會落蒙小江東流與融水合
經潯藤入於南海西一百五十里曰思恩縣西二
百十五里曰河池州西南四百二十里曰東蘭州
危峰疊嶂列峙如戟雍正七年改流州治經營百

度伊始若廼被荒裔於禮讓亦良牧之責也南一百十里曰忻城縣烏泥之水出焉西三百四十二里曰南丹州西北一百八十里曰荔波縣雍正十年改屬黔省西南二百四十里曰那地州永定司永順正副司皆在府西大都土壤遐僻江灘險峻雖有奇境人跡罕至猺獠巢穴較柳為多西北控牂牁昆明十五部地最為嶺南要害南北西三巢曩時猺獠出沒今移同知於德勝鎮貼近彈壓并

添設龍門巡檢而移德勝之守備於東蘭駐防東
院內六哨其他控制聯絡戍守森密奸宄咸知斂
戢夷習日以寢變自馮當世起於宋文風益卓然
傑出焉

慶遠府圖說

楊芳

慶遠越在西北極境環繞土夷惟東北與柳城接
地遼闊益右江一藩蔽也石壁巉巖江流迅急兩
岸無路中深不可測舟則捫石而上以故商旅罕

通郭以外民之家一而狴犴之穴九柄事者未始
不以備禦為難今查沿途所設堡舍非不星列哨
守之官非不分領要害而兵非漢種將不知兵蓋
將舊時剽沒田土即屬伊布種因令隨地戍守雖
迹若不費而兵足然非我族類心與面殊一城孤
懸四面皆敵不可謂無虞也兵既不足匪但谿崗
不逞之徒得以肆其出沒而土蠻亦且妄自恣睢
轉萌他志郡蓋難之難矣

思恩府圖經

思恩軍民府在省治西南東至柳州府來賓縣界
二百八十五里西至雲南廣南府土富州界七百
一十里南至南寧府宣化縣界一百三十里北至
慶遠府永定司界二百四十里自府治至京師八
千六百六十里明以土州陞府宏治間岑濬作亂
誅滅改流置鳳化縣尋廢設九土司割南寧武緣
縣隸之并轄諸土府州縣地袤延幾二千里泗城

鎮安皆府屬割立舊疆之廣殆半省焉舊自武緣外皆土屬雍正十二年增轄賓州及上林遷江二縣賓地層山峻嶺上林東西撫卽八寨餘孽故時相仍煽惡延接九土司桀黠捍網者每恃為逋逃數裒益宜有更置也南五十里曰武緣縣山水清曠而輿折風土與瘴鄉差異東南一百五十里曰賓州有山曰領方昔嘗取以名郡矣崑崙絕險以界賓邕東北一百八十里曰上林縣思鄰大明之

山綿接武緣多仙靈蹟二百八十里曰遷江縣武
郎之水出焉西南二百九十里曰土上林縣西二
百十里曰下旺司四百五十里曰土田州附田州
之百色市以同知移駐右江鎮扼制上游為由滇
入粵要衝也西北五十里曰那馬司九十里曰定
羅司一百五十里曰舊城司二百里曰都陽司東
北八十里曰白山司北六十里曰興隆司一百六
十里曰安定司東北八十里曰古零司土蠻宿勾

連啟釁裁改潯州通判駐劄其地勢與土田州埒
府治舊自寨城山徙喬利再徙荒田山勢蜿蜒數
為平原兩水夾繞環抱涵畜合流入武緣江達南
寧地闊土腴商通貨集審其形勢而聯絡指臂駁
駁乎富庶日增人文蔚起矣

思恩軍民府圖說

思恩始定寨城遷喬利又以瘴霧移荒田驛疏兩
水繞山以合巨浸居重之勢成矣顧荒鹵厥田為

下下百物罕生一日之間寒燠互換迅風疾雷暴雨恒什之九而三面環夷獨東南一面聯武緣南寧蓋職方絕徼也江流淺窄商賈跡希雖八寨柴池蕩平而郡治孤懸左右顧無羽翼所恃城外東西置二哨別募兵控守兵雖少然勤訓練嚴稽覈足以自固况所轄九司皆兵緩急又足藉也惟壤接土州逋逃為數鼠竊歲無虛日且閭閻積億風化寢淪撫柔諭教其在良二千石乎

泗城府圖經

泗城府在省治西東至慶遠府東蘭州界二百里
西至貴州普安州界四百五十里南至思恩府田
州界一百五十三里北至貴州永豐州界三百七
十五里自府治至京師九千三百六十里本思恩
屬土府因土官不職懼誅繳印改流設知府割直
隸一州及一縣屬之其地四面懸崖兩闕局鑰靈
洞一水中貫凌江波而建治垣塹實天造焉府西

北四百里曰西隆州居萬山中山峻瘴深議移治
扁牙距府僅二百里紅水江繞其西北入柳江府
西南三百四十里曰西林縣山有木龍獨旺水則
馱悶河源自滇南挾剝馱西洋諸水入右江而達
海府州舊疆遼濶以黔粵爭界劃紅水江北地盡
隸貴州江南提封猶千里焉然而絕巘崕岬求其
衍沃可田者殆鄒滕之不逮也

泗城府圖說

泗城居萬山中絕壁參天鮮平壤紅水牂牁南北
夾繞廣遠雄視諸郡雖尙起於唐州置於宋而所
謂谿尙羈縻史無稱焉殆非唐宋元之所得而羈
縻者已明洪武五年周德興平婪鳳安田諸尙遂
克泗城始入版圖永樂間分安隆上林兩尙各置
司以泗城岑善忠兩子為長官隸思恩雖曰推恩
及其子弟意實削弱之迨正統而程縣利州併於
岑豹兩長官司正德間仍據於岑接明未嘗一問

桀驚有自來矣

本朝緣岑繼祿從征滇黔功升府進勦吳逆又身為
向導兵力之銳甲兩江然其子孫卒以盜弄罹罪
改革豹接之報不亦宜乎康熙五年改安隆長官
司為西隆州北接黔上林長官司為西林縣南接
滇皆設流官雍正四年以州直隸領縣五年劃隆
泗紅水江北地七百里隸黔改泗城為流府遂以
州縣改屬水土瘴毒民為土官積威所劫咸就兢

奉法邊吏益加之拊循足為西徼重藩矣

直隸鬱林州圖經

直隸鬱林州在省東南東至梧州府容縣界六十
里西至廣東廉州府合浦縣界一百九十里南至
廣東高州府化州界一百七十里北至潯州府桂
平縣界一百二十里自州治至京師八千四百三
十里原屬梧州府雍正三年改直隸州領縣四川
原平遠有南流水過羅望江會定川江至廣東高

州入於海州西南七十里曰博白縣有大荒山其
上有池雙角山下有江東四十五里曰北流縣有
勾漏山鬱紆突起為寶靈之臺石湫玉田風雲生
焉其北有綠藍山水繞城下北流入藤會鬱江南
七十里曰陸川縣有鳴石之山崑崙之水北六十
里曰興業縣有鐵圍山羅列障蔽鬱林於古稱郡
顧介延嶺海之間密邇獠蠻往之荷戟負劍盜弄
而竊發者數矣今則安恬豐阜沃野廣衍農田之


利為粵徼先凡厥庶民既富方穀亦庶幾登茲治
理哉

直隸鬱林州圖說

鬱林當梧西腋斜接潯點襟帶廣東之高廉二郡
介嶺負海地廣山叢亦西粵要區矣

國家設立專營以參將駐轄聯絡汎防姦宄不作百
年疆場晏然又改置直隸環領四縣誠審乎控馭
之宜也北流勾漏擅美地靈而藤釐瑞泉斯啟祐

我農田謂非天之協應歟勤撫循而敦化理吏治
蒸蒸隆古寧獨使廉石風流臺存景陸已乎



廣西通志卷四